

## Ching wei sech bewege

De Ching macht Bewegig Spass, wöu si so dWäut erläbe. Ching wei loufe, springe, chlättere und sech dräihe, wei tanze, luut und lieslig si, singe, muetig, mau ganz zOberst sto, ihre Körper so entdecke und ihm immer meh vertraue. Ihri Sinne dürs probiere, schmöcke, lose, luege und gspüre entdecke. Aber o ds Zuelose und sech ire Gruppe integriere söu erläbt und glernt wärde.

Ja, so läbhaf, abwächsligsriech und vieusitig isch üses **ELKI-Turne**. Afangs 2017 heimer zum Thema Farbe turnet und im Ougust simer mit üsem neugierige Maskottchen „Hoppsi“ dWäut ga kennelehre.

Zwöimau im Jahr, jewiels amene Samstagmorge turne mir mit de Ching u ihrne Papis zäme. Zu de Theme Fasnacht und Post heimer zwöi spannendi, farbefrohi und lustigi VAKI'S erläbt. Ds Apéro mit dr ganze Familie het natürlech o nid dörfe fähle.

Mit de Lieder „Eye of the Tiger“ und „Hakuna Matata“ simer am Soirée aus Roubchatze und Dompteure ufträte. Ds Verchleide het de Ching super Spass gmacht u de ersch no di viele Bürzliböum wo sie hei dörfe vorzeige.

Ä spezielle Momänt steit mir i drü Wuche bevor, weni ds letschte Mau mit de Ching zäme due turne und mini Leitertätigkeit offiziell abgibe. Zrückblickend uf die letschte 6 Jahr hani wunderbari und eimaligi Turnstunde dörfe leite aber o aus Mami säuber dörfe mitturne. Am neue Leiterteam Denise & Sanja wünschi vo Härze vieu Freud und äs guets Zämeschaffe.

Zum Schluss äs grosses MERCI ad Denise für die sehr agnämi und schöni Zämearbeit i de letschte zwöi Jahr und äs MERCI a Vorstand für dUngerstützig!

Bliebet Aui gsung und pautet dFreud am Turne.

Härzlechi Grüess, Bianca Burckhardt